

## Chor dils Larischs e ils dirigents



50 onns Chor dils Larischs. In mez tschientaner ston ins festivar. 1970 è il chor vegnì fundà cun 11 chantadurs passionads. Quels emprims onns d'uffanza steva il chor sut la batgetta dal renumnà musicist e cumponist **Gion Giusep Derungs**. Quel ha gì il dun dad intgantar il pitschen chor per sia moda e maniera da far musica. Uschia ha il chor emprendì da star sin las atgnas chommas. Suenter trais onns, pia il 1973, ha lura **Markus Zarn** sorprendì la batgetta. Cun maun ferma ha el dirigì il chor betg main che 33 onns. Il chor è creschì e vegnì madir, s'ha furmà ad ina

cuminanza cumpacta. Ils Larischs han persvadì lur fans ed admiraturs en Svizra ed en l'exteriur, quai cun in tun da chor viril unic e ferm. La chanzun rumantscha steva gia quels onns en il center dal repertori.

1980 (Ave Maria ensemen cun l'organist Hannes Meyer) e 1986 (Ils Larischs chantan) han ils Larischs registrà duas plattas fonograficas, e 1992 (Viva la veta) ina CD. E sa chapescha ch'il Radio e la Televisiun Rumantscha han registrà pliras giadas chanzuns chantadas dals Larischs. Anecdotas ed istorgias da quels onns tunan mintgant sco istorgias da lumpazis e furbazs. Ma cun ir dals onns vegnan las burascas pli raras e pli moderadas. Ils chantadurs vegnan pli raschunaivels. L'onn 2006 ha Markus Zarn decidì da surdar il chor ha mauns ed ureglias pli giuvnas.

**Mattias Müller**, in giuven chantadur bariton da Cuira, ha lura sorprendì il chor. Sia moda giuvna e directa era propi in contrast cun la rigur da ses antecessur Markus Zarn. Cun grond success ha el introducì er la litteratura classica en il chor. En memoria restan cunzunt gronds e bels concerts ensemen cun il chor da chombra "Pokroff" da Moskau. Grazia als Pokroffs ha il Chor dils Larischs gì 2008 la pussaivladad da realisar in viadi da concert a Moskau. Er il giubileum da 40 onns – realisà ensemen cun il chor da dunnas "Raieta" dal Tirol dal sid – è stà sut la batgetta da Mattias Müller. Er qua hai dà ina bella cuntravisita ed in concert a La Val (Wengen).



Suenter mo 4 onns Mattias Müller ha il Chor dils Larischs engaschà il maestro actual, il **Curdin Christoffel** da Pitasch. Fin, precis e dinamic – tenor quel creda ha Curdin Christoffel glimà il sound dils Larischs. "Avant che vulair chantar forte stuais vus esser abels da celebrar in fin piano". La critica da Markus Zarn suenter ses emprim concert resplenda quellas duas differentas filosofias: ma lascha tuttina chantar tes umens in forte. Ma la sensibladad e l'insistenza da Curdin Christoffel ha rinfrestgà e motivà il chor. Sin tribuna stattan oz umens grischs – ils blers dad els han passà il mez tschientaner – ma tuts èn cun corp ed olma chantadurs dal Chor dils Larischs.

Uschia sto il chor dils Larischs betg avoir tema da l'avegnir, e po cun buna raschun far quint ch'i vegnia chantà er en il segund mez tschientaner cun disciplina, elan e plaschair.